

Broj: 06-03-224/5/16
Mostar, 18.02.2016. godine

Na osnovu člana 21. stav (1) tačka 9), člana 37., člana 84. stav (3) i člana 87. stav (2) Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13 i 94/15), člana 10., člana 20. stav (1) i člana 23. stav (1) Statuta Regulatorne komisije za energiju u Federaciji Bosne i Hercegovine („Službene novine Federacije BiH“ broj 24/14 i 91/15), člana 8. stav (1), člana 32. stav (4)) i člana 46. Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“ broj 29/14), člana 78. Pravilnika o javnim raspravama i rješavanju zahtjeva, sporova i žalbi („Službene novine Federacije BiH“ broj 57/12 i 71/14), člana 44., člana 48. stav (1) tačka c) i tačka h) i člana 49. stav (2) Pravilnika za izdavanje dozvola („Službene novine Federacije BiH“ broj 43/14), postupajući na vlastitu inicijativu, Regulatorna komisija za energiju u Federaciji Bosne i Hercegovine – FERK je 18.02.2016. godine na II redovnoj sjednici donijela sljedeće

R J E Š E N J E **o oduzimanju dozvole**

1. Imaocu dozvole „KTG ZENICA“ d.o.o. ZENICA, Bulevar kralja Tvrtka I broj 17, Zenica oduzima se Dozvola za rad - licenca za snabdijevanje električnom energijom – dozvola II reda broj 06-03-1085/81/13, izdata 23.12.2013. godine, sa periodom važenja od 12.03.2014. godine do 11.03.2019. godine.
2. Ovo rješenje je konačno i stupa na snagu danom donošenja, te se objavljuje na oglasnoj tabli i internetskoj stranici FERK-a, a dispozitiv ovog rješenja u „Službenim novinama Federacije BiH“.
3. Stupanjem na snagu ovog rješenja prestaje važiti Rješenje broj 06-03-1085-11/81/13 od 23.12.2013. godine, kojim je izdata Dozvola za rad - licenca za snabdijevanje električnom energijom – dozvola II reda broj 06-03-1085/81/13.

O b r a z l o ž e n j e

Članom 21. stav (1) tačka 9) Zakona o električnoj energiji u Federaciji Bosne i Hercegovine propisano je da je nadležnost FERK-a izdavanje, obnova, prenos ili oduzimanje dozvola za proizvodnju, distribuciju, snabdijevanje, trgovinu električne energije i operatora za obnovljive izvore energije i kogeneraciju. Članom 84. stav (3) ovog zakona propisano je da je imalac dozvole dužan ispunjavati obaveze utvrđene dozvolom za rad, dok je članom 87. stav (2) istog zakona propisano da FERK izdaje, obnavlja, prenosi ili oduzima dozvole za rad u skladu sa procedurama propisanim posebnim aktima FERK-a, poštujući načela hitnosti postupka.

Članom 44. Pravilnika za izdavanje dozvola propisano je da se postupak obnove, izmjene i dopune, prenosa i oduzimanja dozvole za rad može pokrenuti na zahtjev imaoca dozvole i na vlastitu inicijativu FERK-a, dok je članom 48. stav (1) tačka c) i tačka h) istog pravilnika propisano da će FERK oduzeti dozvolu za rad ukoliko imalac dozvole ne pruža FERK-u zahtjevane informacije i podatke u periodu važenja dozvole za rad, neophodne za

obavljanje poslova iz nadležnosti FERK-a, te ukoliko ne plati regulatornu naknadu. Takođe, članom 49. ovog pravilnika propisano je da se postupak obnove, izmjene i dopune, oduzimanja i prenosa dozvole, vodi na isti način kao i postupak izdavanja dozvole, ali i da ukoliko su u zahtjevu za pokretanje postupka navedene činjenice ili podneseni dokazi na osnovu kojih se može utvrditi stanje stvari ili ako se to stanje može utvrditi na osnovu opštepoznatih činjenica ili na osnovu službenih podataka kojima FERK raspolaže, ovi postupci se mogu provesti i donijeti odluka o podnesenom zahtjevu bez objave obavještenja za javnost o podnesenom zahtjevu i bez održavanja javne rasprave.

FERK je vršenjem Zakonom o električnoj energiji u Federaciji Bosne i Hercegovine propisanih nadležnosti ustanovio da imalac Dozvole za rad - licence za snabdijevanje električnom energijom – dozvole II reda broj 06-03-1085/81/13 od 23.12.2013. godine, „KTG ZENICA“ d.o.o. ZENICA nije postupio u skladu sa uslovima izdate dozvole, na način da isti od 12.03.2014. godine nije dostavio niti jedan izvještaj u skladu sa FERK-ovim Pravilnikom o izvještavanju za imaoce licence za djelatnost snabdijevanja električnom energijom II reda i nezavisne proizvođače („Službene novine Federacije BiH“ broj 15/11).

Međutim, iz mjesečnih izvještaja o trgovini električnom energijom koje Nezavisni operator sistema u Bosni i Hercegovini – NOSBiH dostavlja FERK-u vidljivo je da „KTG ZENICA“ d.o.o. ZENICA u periodu od 12.03.2014. godine do 31.12.2015. godine nije imao kupovine ili prodaje električne energije. Iz svega navedenog neupitno proizilazi da „KTG ZENICA“ d.o.o. ZENICA ne obavlja djelatnost za koju je dobio dozvolu za rad – licencu. Utvrđeno je i da isti imalac dozvole nije obavijestio FERK o eventualnim okolnostima zbog kojih opravdano ne može obavljati djelatnost navedenu u dozvoli za rad - licenci, kao ni o svim važnijim izmjenama u pravnom okviru, sudskim odlukama, događanjima ili ugovorima koji imaju uticaja na njegovo obavljanje djelatnosti snabdijevanja električnom energijom II reda.

Pored navedenog, FERK je utvrdio da imalac dozvole „KTG ZENICA“ d.o.o. ZENICA nije platio regulatornu naknadu za III i IV tromjesečje 2015. godine i I tromjesečje 2016. godine, što je bio u obavezi u skladu sa članom 84. stav (3) Zakona o električnoj energiji u Federaciji Bosne i Hercegovine, te Odlukom o utvrđivanju regulatornih naknada za 2015. godinu broj 08-07-727-01/15 od 31.08.2015. godine („Službene novine Federacije BiH“ broj 69/15) i Odlukom o privremenoj regulatornoj naknadi za period 01.01.2016. – 30.06.2016. godine broj 08-07-1023-02/15 od 08.12.2015. godine („Službene novine Federacije BiH“ broj 97/15). U vezi sa navedenim, FERK je imao dozvole uputio sljedeća obavještenja kojima je utvrdio iznos regulatorne naknade i obavezu plaćanja iste:

- Obavještenje broj 15-360-000201 od 20.07.2015.godine
- Obavještenje broj 15-360-000366 od 01.10.2015. godine
- Obavještenje broj 16-360-000070 od 05.01.2016. godine.

Iz navedenog slijedi da je imalac dozvole „KTG ZENICA“ d.o.o. ZENICA povrijedio tačku 4.14. dozvole za rad – licence, kojom je propisano da je imalac dozvole obavezan FERK-u dostaviti izvještaje u skladu sa Pravilnikom o izvještavanju FERK-a za imaoce licence za snabdijevanje električnom energijom drugog reda i nezavisne proizvođače. Takođe, utvrđeno je da je isti povrijedio i tačke 8.1. i 8.2. dozvole za rad – licence, kojim je propisano da je imalac dozvole obavezan obavljati djelatnosti navedene u dozvoli, te da je, ukoliko tokom obavljanja djelatnosti nastupe okolnosti zbog kojih imalac dozvole opravdano ne može obavljati djelatnosti navedene u dozvoli, obavezan o tome, bez

odlaganja, obavijestiti FERK, odnosno da imalac dozvole ne može bez prethodnog odobrenja FERK-a napustiti ili izmijeniti licenciranu djelatnost. Osim toga, povrijeđene su i tačke 16.1. i 16.2., kojim je propisano da je imalac dozvole obavezan plaćati regulatornu naknadu za obavljanje licencirane djelatnosti u iznosu koji utvrdi FERK posebnom odlukom, te da se regulatorna naknada plaća tromjesečno.

U vezi sa svim navedenim, u skladu sa članom 48. Pravilnika za izdavanje dozvola FERK je imao dozvole „KTG ZENICA“ d.o.o. ZENICA 08.01.2016. godine pod brojem 08-03-20/16 uputio Opomeni, kojom je istom ostavljen rok do 15.01.2016. godine da otkloni nedostatke, odnosno da u FERK dostavi:

- izvještaje koja je bio dužan dostavljati FERK-u u skladu sa Pravilnikom o izvještavanju za imaoce licence za djelatnost snabdijevanja električnom energijom II reda i nezavisne proizvođače,
- informacije o eventualnim okolnostima zbog kojih imalac dozvole opravdano ne može obavljati djelatnosti navedene u dozvoli, ukoliko su iste nastupile i
- detaljno obrazloženje razloga neplaćanja regulatorne naknade FERK-u.

Osim navedenog, imao dozvole je u Opomeni ostavljen isti rok za plaćanje regulatorne naknade u skladu sa Odlukom o utvrđivanju regulatornih naknada za 2015. godinu broj 08-07-727-01/15 od 31.08.2015. godine. U istoj opomeni imalac dozvole je upućen da će FERK, u slučaju da isti ne otkloni navedene nedostatke u datom roku, poduzeti aktivnosti u skladu sa tačkom 11. izdate dozvole za rad – licence, što podrazumijeva mogućnost pokretanja postupka za izdavanje prekršajnog naloga i pokretanje postupka oduzimanja dozvole.

Imalac dozvole za rad - licence „KTG ZENICA“ d.o.o. ZENICA nije u ostavljenom roku postupio po navedenoj opomeni, niti je u FERK dostavio bilo kakvo obrazloženje vezano za navode iz iste. Međutim, nakon isteka ostavljenog roka, odnosno 20.01.2016. godine imalac dozvole je dostavio FERK-u mjesečne izvještaje za 2014. i 2015. godinu, primljene pod brojem 06-03-77/16, koja je bio u obavezi dostaviti FERK-u u skladu sa Pravilnikom o izvještavanju za imaoce licence za djelatnost snabdijevanja električnom energijom II reda i nezavisne proizvođače, ali pri tome nije dostavio ostale opomenom zatražene informacije i obrazloženja.

Na osnovu naprijed navedenog FERK je utvrdio sljedeće:

Prilikom izdavanja Dozvole za rad – licence za snabdijevanje električnom energijom – dozvole II reda broj 06-03-1085/81/13 od 23.12.2013. godine „KTG ZENICA“ d.o.o. ZENICA, FERK je postavio određene uslove imaoce dozvole, u skladu sa ovlaštenjima iz člana 87. Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13 i 94/15). Međutim, suprotno postavljenim uslovima u tačkama 4.14., 8.1., 8.2., 16.1. i 16.2. „KTG ZENICA“ d.o.o. ZENICA nije obavljao elektroprivrednu djelatnost za koju mu je izdata dozvola za rad – licenca, niti je obavijestio FERK o eventualnim okolnostima zbog kojih opravdano ne može istu obavljati, te nije platio regulatornu naknadu.

Kako imalac dozvole nije otklonio sve nedostatke navedene u Opomeni broj 08-03-20/16 od 08.01.2016. godine, stekli su se uslovi za oduzimanje dozvole u skladu sa članom 48. Pravilnika za izdavanje dozvola i članom 87. stav (2) Zakona o električnoj energiji u Federaciji Bosne i Hercegovine.

Slijedeći navedeno, te obzirom da se stanje stvari može utvrditi na osnovu službenih podataka kojima FERK raspolaže, iz kojih razloga je postupak proveden bez objave obavještenja za javnost i bez održavanja javne rasprave, odlučeno je kao u dispozitivu rješenja.

POUKA O PRAVNOM LIJEKU:

Protiv ovog rješenja „KTG ZENICA“ d.o.o. ZENICA može tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana prijema rješenja. Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

v.d. PREDsjedNICE FERK-a
Sanela Pokrajčić